

四庫全書

集部

欽定四庫全書

集部
因園集卷二

詳校官左中允_臣瑯五珠

助教_臣常循覆勘

總校官進士_臣朱 鈐

校對官編修_臣方 煒

謄錄監生_臣陳子泗

欽定四庫全書

集部七

因園集

別集類六

國朝

提要

臣等謹案因園集十三卷

國朝趙執信撰執信字伸符號秋谷晚號飴山
老人益都人雍正中益都置博山縣今為博
山人康熙己未進士官至左春坊左贊善其
詩集流傳頗夥諸本往往不同此本末有乾

隆辛酉執信門人丁際隆跋稱是秋重謁秋
谷先生於因園時先生病目彌甚不作詩者
六年矣從仲君羹梅得先生手定詩稿分十
三集錄副未及校而羹梅遽索原本以去歲
寒無事乃校一過曩見手書濟南竹枝及宿
法慶寺二律皆不在蓋所刪多矣云云羹梅
者常熟仲是保之字為執信門人之冠最為
篤契則是集為執信晚年定本手以授之者

矣十三集者一曰并門集二曰閒齋集三曰
還山集四曰觀海集五曰鼓枻集六曰涓流
集七曰葑溪集八曰紅葉山樓集九曰浮家
集十曰金鷺館集十一曰回帆集十二曰懷
舊集十三曰礪菴集集各一卷以存其舊不
復以篇頁多寡為分也執信娶王士禎之甥
女初相契重相傳以求作觀海集序士禎屢
失其期遂漸相詬厲讐隙終身今觀還山集

中尚有酬士禎詩二首又為士禎作西城別墅十三咏至鼓枹集中渡江一首已有祇應羨詩老持節問岷源句註曰謂阮翁又悼吳孝廉一首有漁洋未識名先著句其詞氣已不和平自是以還遂互相排擊則謂二人之釁生於作觀海集時其說當信迨其後沿波逐流遞相祖述堅持門戶入主出奴數十年迄無定說平心而論王以神韻縹緲為宗趙

以思路剗刻為主王之規模濶於趙而流弊
傷於膚廓趙之才力銳於王而末流病於纖
小使兩家互救其短乃可以各見所長正不
必論甘而忌辛是丹而非素也乾隆四十五
年九月恭校上

總纂官

臣紀昀
臣陸錫熊
臣孫士毅

總校官
臣陸費墀

欽定四庫全書

因園集卷一

左贊善趙執信撰

并門集

督亢懷古

燕丹昔逃秦身免怨未雪千金求死士快意期一決徒
逞匹夫憤焉知霸王烈我聞燕先王築臺市駿骨晚得
昌國君雄心一朝豁全齊七十城紛如槁葉脫但隆郭

隗里不灑田光血豈有熊羆臣輕試虎狼穴可憐易水
上壯士衝冠髮事敗國旋亡寂寞名未滅

陘陽驛雨甚行橐皆濕輿中聊述

欲知肩輿行遇雨有似曳尾塗中龜聳身延頸欲前去
四足不動如懸槌堵窗欹枕雨脚入紛斜一任西風吹
我既衣裳有霑濕迴視我僕嗟亦疲幸餘臟腑未滯濯
豈免涕淚同淋漓無因天漏藉石補反思油衣以瓦為
人生有情每無厭遨遊謂樂居可嗤請看行役足辛苦

他時枯坐無庸悲

道傍碑

道傍碑石何累累十里五里行相追細觀文字未磨滅
其詞如出一手為盛稱長吏有惠政遺愛想像千秋垂
就中行事極瑣細齟齬不顧識者嗤徵輸早畢盜終獲
黷宮既葺城堞隨先聖且為要名具下此黎庶吁可悲
居人遇者聊借問姓名恍惚云不知住時於我本無恩
去後遣我如何思去者不思來者怒後車恐蹈前車危

深山鑿石秋雨滑耕時牛力勞輓推里社合錢乞作記
兔園老叟頤指揮請看碑石俱甃甃身及妻子無完衣
但願太行山上石化為滹沱水中泥不然道傍隙地正
無限那兔年年常立碑

獲鹿至井陘道中三首

城邊沙水路數里入山村高處雲封屋秋來草沒門牛
羊緣澗遠童稚避人喧却聽樵歌返前峯日已昏

驅馬指榆水

村名

晚陰山雨來前村一點火倦客意悠哉

猶隔數峯遠還從深樹迴暗中聞犬吠始見竹籬開
曉日不照地羣峯方障天行人聽雞起鳥道接河懸遠
樹猶藏雨高城半出烟秋來無限思牢落付山川

井陘道歌

晚雲挾雨風不休井陘古道行人愁未知駐足竟何處
羣山來往相遮留初緣細路行逾上風中一線秋空淨
徑迴兩壁競奇詭坐令谿谷成深幽久行祇畏前路絕
下視尋丈何能投失勢忽落不自覺天宇頓被蒼厓收

四圍樹石怒相向森然拏攫紛蛟虬人如迴飈激下葉
馬擬古棧穿猿猴已覺心氣俱沮喪敢云追躡窮冥控
嗟乎絕險天所設左車當日真良謀如何旗鼓走水上
戲下反致成安頭古來成敗兩寂寞山川滿目增煩憂
道傍戰壘野花放雨餘山鳥鳴啁啾

宿平定州雨竟夜聞七十二河水大至

倦行得投憩如鳥有棲託下馬衣盡霑入門步猶却屋
角張明鐙晚炊具藜藿取足供醉眠濁醪恣深酌窈窕

青玉峽迢遙夢中約如何就枕憂反遯據鞍樂入夜殷
雷喧雨聲亂城柝汎瀾散簷溜浸淫到帷幕頗聞向曉
行驛路緣澗壑石齒既叢生潦水正噴薄四山懸瀑集
勢若崩崖落直恐穿山骨安能容畧約已知前路難更
聽雨勢惡殘更遠欲斷冷焰濕不著轉畏天欲明孤吟
向索莫

涉七十二河

犯曉指前途天清雨氣散迴瞻孤城際遙出大河岸山

勢鬱屯雲水聲激流電波盪巨石奔灘坼地軸轉居人
能嚮導小駟頗趨悍揚鞭亂流去直與驚湍戰圓浪欲
沒鞍輕漚時及面浮沉遡衆川攀緣望絕棧豈惜衣履
濡寧辭登涉倦斜陽向晚放驛舍炊烟亂有如異國歸
遙天見鄉閭馬飢僕亦痛水盡山未斷候吏不須迎前
馳已如箭

晚發芹泉驛夜過壽陽

日暮憇芹泉暝色動諸嶺路紆未擬停馬飽方思騁新

月乍微茫羣星半耿耿遠雲時作陰積雨正多潭地明
知近河徑轉畏逢窅不知幾里遙忽在萬峯頂陰陰俯
厓際簌簌亂林影深谷聚豺狼澗潦喧龜鼃山腰忽一
燈鬼火出埒井秋毫皆易驚觀聽何由屏風高溪壑哀
露下衣裳冷前途漸逶迤客心轉虛迴昏眸呼不開倦
轡時復整壽陽城上鐘殘夢三更醒

夜度黃嶺

星稀月落夜轉昏黃嶺嶺上寒生雲憑虛直上二十里

勢與天闕爭中分我行但覺馬人立據鞍自笑如孤猿
前驅已遠後相失空餘呼嘯風中聞昨聞此嶺真險絕
頓愁無翼難飛翻曹然登降無所懾夜氣為我留精魂
泥路蜿蜒勢漸下俯聽雞犬罵荒村東方放曉日欲出
却望天際危此身

中秋夜

秋氣驅殘雨空庭來遠颼一杯桑落酒半夜月明時久
客嫌宵永初寒覺醉遲還將蕭瑟意遙與菊花期

太原縣拜先曾大父生祠三首

曾大父昔為少參均晉祠水利有德於民故祠焉
祠鄰大佛寺楹間有觀察叔祖奉使時所題詩

曉色微分秋暮天村烟祠樹正清妍
遠山雲氣日初上古寺梵聲鐘共傳
下馬身從千里外登堂夢隔十年前
他鄉歲晚增多感酌酒臨風一愴然

當年榮戟駐河干片紙能令萬戶歡
曾向清流照顏色到今白叟識衣冠
村荒亂木隨秋下山逼驚風盡日寒

歲序易遷遺廟在居人珍重後時看

憶從薄宦客京師邱墓松楸入夢悲乍喜家山歸有日

又來汾上住經時兒孫枉灑天邊淚父老能留去後思

待向故園兄弟道他年重問舊題詩

方圖便
道歸省

雨中泛汾水感興

細雨已作泥微風能漾舟渺渺入汾水
息息懷勝遊漢代昔巡幸畫舸張龍旂
冠蓋擁前列簫鼓橫中流棹歌今歇絕
千載長清秋我行望天末雲物慘不收羣
山莽

迴互水木相綢繆地勢亘終古世事隨浮漚乃知前人
名翻藉山川留舟人理楫急及岸還夷猶把杯酌水渌
此意空悠悠

九日晉祠

野菊霜姿向客妍孤村木落更蒼然也將世上黃塵面
來對山中碧玉泉桐葉遺封還百里晉陽王氣已千年
爽鳩東望堪憑弔都付西風落照邊

將遊鑛鐵院以病不果

古院不一遊虛作并州客寒鐵夜有芒秋井水無色病
思清冷對夢覺鐘梵寂想見靜中僧時時掃苔迹

發太原

青烟一點望依然馬首蒼茫又著鞭此地空斟桑落酒
故園已過菊花天薄遊歲月清霜候歸路關山黃葉前
惟有離心汾水上應隨秋雁共年年

晚行

雨脚背城見前村開晚晴近山風轉急隔水月初生樹

杪懸燈火烟中隱
碓聲今宵魂斷處
野館醉三更

郭有道墓下二絕句

斗筭賤役良不屑
識鑒人倫亦偶然
何意舟同李元禮
時流解望作神仙

中郎無愧至今稱
因憶昌黎豈近名
不是高文能諛墓
黃金何處壽劉生

冷泉關

霜凝疎樹下殘葉
馬踏寒雲穿亂山
十月行人覺衣薄

曉風吹送冷泉關

曉過靈石

曉色依依嶺上橫
望中雲物轉淒清
林收宿霧初通日
山挾迴風盡入城
客路遠隨殘月沒
鄉心半向早寒生
驚鴉滿眼蒼烟裏
愁絕戍樓橫吹聲

國士橋

橋上馬嘶破殘月
溪邊流水聲幽咽
風迴激浪上橋頭
似濺當年擊衣血
伏劍如飴豈顧身
至今此地留精魂

由來國士自千古試問中行是衆人

始雪過東西塢二嶺

天陰覺曉遲乍雪山更寂蕭槭絕人烟蒼茫入寒色林
空遠望通徑轉迴峯逼二嶺鬱相當中見雲氣積高風
束四山冥冥接天白行人躡空濛馬足畏偏仄忽疑厚
地傾又覺陰厓路澗壑何深幽云是虎狼宅地險念身
孤客久知時迫故山候尚溫奮飛無羽翮向暝昧所投
浩然促輕策

沁水使院望石樓山雪

孤峯壓城頭雪色落屋瓦高堂收衆陰目極天四下空
烟寒欲開晚雲散如瀉遠見羣山來莽莽亂奔馬長松
分巖谷猛虎憑城社入夜風怒號居人畏中野行役良
苦辛山川自蕭灑悵望聽深更躊躇引杯罍

陽城夜飲

高館張燈天向昏山城打鼓曉逾喧不知酒力誰深淺
一夜開簾雪沒門

山行雜詩四首

嶺路盤盤行欲迷
晚來霜霰忽淒淒
林間風過猶兼葉
澗底寒輕已作泥
馬足蹙時疑地盡
溪雲多處覺天低
倦遊莫訝驚心數
歲暮空山鳥亂啼

晚雲忽散見峯巔
遠寺鳴鐘思悄然
積雪更宜新月照
輕烟不障暗流懸
行同宿鳥趨林急
穩羨山僧擁絮眠
正好溪風送前路
一燈明滅戍樓邊

絕巘平臨遠目開
天風吹我離去聲氛埃
路於殘雪消中

見人自羣山闕處來
樹外連峯橫作鄣
馬前雲氣散成堆
平生蠟屐尋幽興
落日登高首重迴

十日山中汗漫行
山雲作意變陰晴
連天細雪因風急
近郭空烟接日生
鞭影遠牽殘照色
馬蹄寒踏斷冰聲
定知此後相思處
贏得清樽夜夜傾

發澤州宿星軺驛盡日行太行最深處

出郭未十里
陟嶺凡幾盤
徘徊初日影
隱見羣峯端
遙空斂餘陰
山風增曉寒
我行曾冰中
仄徑愁躋攀
馬壓

後人頂足滑不得安縈紆自信地倒側惟隨鞍久依懸
厓轉每疑絕壁穿歛同鳥上下紛與雲勾連平臨衆皸
出旁見高天寬四山森列笏戢戢爭荒烟林木接蕭瑟
萬壑寒聲傳牛羊入殘雪蠕動叢莽間登頓倦行侶曠
覽開心顏日晚見人家列屋緣層巒斜陽明萬瓦烟火
動夕餐不厭野宿孤益羨山居便溪黑虎豹嗥月出烏
鵲還歲晏遠為客中宵起長嘆

天井關

金少府集卷一
試凭雄關望偏增客意豪驚風吹澗直落日覺山高亂
樹入雲盡悲禽分野號從來爭戰地覽古首頻搔

下太行入河北

萬山圍馬首峻嶒行相逼如入稠人中倉皇亂迎揖連
朝躡危險徒侶疲登陟曉看白日近漸覺山勢急前路
紛羊腸下赴將何極眼明見平地河色漾寒碧浮雲千
里通清流一線直參差散林莽指點辨城邑久行望彌
真屢下境轉徧迴視高峯顛一一詫所歷野曠山盡收

村晚天半赤向風指孤烟息此窮日力

晚次清化鎮

晚風亂叢竹四野青欲收回頭謝寒山臨別還夷猶孤
城殘照盡雉堞隨星浮烟際聞人聲馬倦亦知投

仙居行

仙居亦在黃塵裏碧瓦如鱗點衛水衛水無聲四野愁
神仙不至千夫死城頭寒日翻大旗使君來遊何委遲
朝朝鼓吹沸城出借問曾與仙靈期仙靈窟宅知何處

海天茫茫隔烟霧盡將膏血作樓臺留與行人自來去
蘧大夫墓

車聲麟麟及闕止衛靈夫人識君子可憐荒土不分明
千古彌瑕共埋死因知往蹟多湮沉下馬陌頭霜草深
尺寸偶然留姓氏武公康叔渺難尋

大名

霜樹迷離擁戍樓寒風近北倍颼颼英雄河朔銷亡盡
獨倚斜陽指魏州

魯連村咏魯仲連

漫說帝秦片時事獨憐排難一生心
空驚玉貌圍城裏
東海茫茫何處尋

華山行

跛者御跛者登婦人帷房聞笑聲
笑聲未絕晉師興
華不注山千青冥
山前東畝何縱橫
欲尋丑父易位處
華泉之水今猶清
紀甌與玉磬
差異城下盟
寡君奉親以
色養
豈意社稷將隨傾
嗚呼寧獨巧笑能傾城

雜詩五首

作客一朝歸如夢久而寤時時心目間惆恍各有遇
遶溪清淺流連村遠近樹兒時所經觀半猶存其故
我嶺雪乍晴烟斂萬家曙磴道入高寒雲山遠迴互
忽驚風景真轉恐遨遊誤漸多相識人踟躕屢狂顧
遙見西郭門疲馬趨如驚莫避市上塵去此十年路
我嶺山名羈棲空計日客遊常畏人豈意廣坐上復覩
平生親再拜視顏色悲喜不可分長者酌我酒相問
遶殷勤童稚

不相識牽衣皆弟舅自憐語音變稍有形容存且與恣
歡讌艱難安足陳

雪後天氣佳選勝攜我友不知山與泉頗憶疇昔否城
邊初日上寒色遍林藪行緣荆山足漸出秋谷口淺瀨
漾輕冰空烟散枯柳更陟我嶺顛極目盡諸有峯壑雜
樓臺出沒各為耦疑是太行中西望頻搔首風土有雷
同取意分薄厚笑問同遊人還勞倒尊酒

招我何碌碌家家春酒熟竭來二十日日日得所欲風

霜雖苦辛醉飽亦酖毒昨宵雙眼昏輾轉羞明燭向晨
昧冠履對案廢篇牘妻孥頗嘲訕客至每局促憶登并
州塞遠窮千里目祇恨杯酌疎在家病良足

高堂張華燈少長各為羣寒風歛殘日氣候晚如春酒
行更相勸既醉情彌敦豈辭今夕醉將為明年人非徒
明年人復是異地身預憂西北路冉冉隨浮雲住日殊
未厭去意方恐分人生苦樂情終古何時均

因園集卷一

欽定四庫全書

因園集卷二

左贊善趙執信撰

閒齋集

送同年馮大木舍人校士湖廣

春秋鬻熊國强大割周甸壤地盡荆梁雄風帶江漢中
分齊晉霸外並秦吳悍三戶竟亡嬴遺烈發項難當時
盛兵力遜世優文翰莊屈引商音朱絃渺餘歎通日頗

衰靡聲格就雌懦才豈敵國用瓜待梁人灌吾友馮舍
人詩思掣驚電髮輟秘閣直不愧中朝遣振衣黃鵠磯
蹇芷碧湘岸楚士競磨厲治鞬鞞絆兩廣嚴權勁三
秋耀組練看君建大旗一鼓萬色變徹札養叔登蒐蕪
得臣薦前年我往晉力欲追舊觀勢已弱古昔時會多
謗訕厚乞汾晉靈小覺耳目換於今論文事毀譽雜真
贗主盟不相下牛耳爭欲擅邾滕為人私門戶紛難算
吾儕亦分道相視各笑粲兩賢既莫避計畫須早辦楚

自長宋盟晉實先魯傳雖聽向戍成不免遠疆諫一彼
與一此事後互譏羨我方怙馭勝君請力邲戰彬彬晉
楚從來歲交相見

送吳天章之太原二首

秋雨勢不已秋風動萬山送君薊門路計日井陘關水
暗黃榆色峽迴青玉顏猶餘馬行處憑夢一追攀

青玉峽在

井陘

把酒說并州茫茫感昔遊邊聲催月曉山氣壓城秋桑

落經時醉黃花九日留君歸渡汾水為問雨中舟

贈李生

生宣城人能星緯
兼相人時將歸矣

李生烟霞人至道窺窬奧有術不自匿變怪出談笑往
為嶺海遊列郡恥晚到竭來長安市一日屈衆妙傳聲
疾雷霆按訪逮形貌輿隸熟招邀公卿藉炫耀相知我
最先奇技向亦好每同宋忠載過請季主教干戈重爬
羅頭面久量校勸我忍貧下計日許騰趨感子鄭重意
失喜還自悼生本田野夫一第良忝冒早仕乏問學行

意成輕傲閒官慙報稱孤立叢謗譙常憂忽失墜知病
竟莫療天時子有徵人事我所料子今欲歸去舊山譜
清嘯索詩持當券不貸王孫報何殊俟河清未必同燭
照覲子言屢中萬一此亦效待我乘星車請子理烟棹
贈賄恐未能遠當遣迎勞

送費生赴淮上

燕市居十年酒徒能幾箇假使設壇坫我將子當佐僦
屋一僻巷氣味兩寒餓招請無昏旦主賓雜坐臥狂或

怒朋輩醉不避驚邏世事如瀾翻舊歡與夢破子今結
束去幕府據高座騎馬到淮南猶及嘗新糯我方持筆
札計日按程課心隨知舊散氣以貧病挫海門波澎湃
薊北塵坳堞銜杯遞相望獨唱誰與和

送同年梁原山吉士改官歸太和

西江人士意氣豪潯陽九派飛寒濤吾黨梁子尤駿發
雄視不覺霜天高姓名早入玉堂籍十年削跡棲蓬蒿
今冬強起赴銓部俄看換職歸諸曹主者用人有深意

衆口不解徒嘈噉尚書事重繫民命竿牘山積煩爬搔
年少諸郎習疎放止堪持酒談風騷木天清曠足容納
坐令戢戢同牛毛如君才力豈易得列卿端藉分憂勞
鴻鵠一舉不可網復欲息羽投林臯鵬歸聊以慰慈母
驟別豈免傷同袍酌酒勸君好自愛南下催馬風如刀

與同年李丹壑編修以事出朝陽門晚宿田家
繁花已盡木葉肥城中城外塵交飛不因出郭了公事
當與野色終相違芳春三月鍵戶坐日在愁陣遭重圍

我自久旅成習慣今昨等耳安知非怪君連歲臥江上
捨舟即陸誰指揮今朝眼豁向水木翻若所見從來稀
清溪宛宛帶櫂柳村舍歷歷通烟霏故山未敢說奇絕
風物似此猶庶幾人情厭常每易動微官竊祿難肯歸
且買濁醪酹暮景新月正照林間扉

夜雨有懷丹壑

臥聞簷瓦添新響坐愛虛窗受遠風不忘對牀前日約
夢隨雨腳過街東

題程松臯舍人詩卷四首

四海故人楊伯子

海寧楊尚木

春來幾度說君詩城東記否

雞羣裏標格亭亭識項斯

昨日叩門日卓午槐陰入座風披猖尚覺歸來太蕭瑟
袖中冰雪生清涼

宋唐門戶久難齊頗怪康莊俗自迷要識神明煥然處
非緣野鷺勝家雞

時人口齒競呀咻字順文從解辨不苦厭支離塵滿眼

期君濯足大江流

觀奕歌

高堂晝閒棋局陳
隱然左右敵國分
主人與客據四角
宛若勢子何停勻
微風動窗日光入
簾影欲亂楸枰文
未知失鹿向誰手
但見眼底生紛紛
乍如青天斂餘靄
一南一北行秋雲
又如殘日墮西極
大星小星耿不昏
豐隆驅電撒沙落
毛仲牧馬雲錦屯
肅肅魚麗就行陣
翻翻鳥散隨飛塵
觀者坐久失向背
目瞠舌撝傷心魂

良工運斤色不動森然萬枝同一根攢眉思出九天上
奮袖氣奪千人軍少焉勝負判然決誰與戚戚誰欣欣
古來兩賢不相厄何況同道猶一身尋讐伺隙有何故
日斜人散寧復論嗟乎世間強弱終無據空遣旁人笑
相語

謝王子言前輩餉酒

偏仄曾同巷南北每看屋角即相思雨添庭際汎瀾處
風攪窗前竹樹時無復罇罍邀我共坐愁泥淖出安之

金定四庫全書
卷二
今宵遣入去年夢一枕簷聲成醉遲

夜大雨曉起視庭際花竹有述八韻

夜半夢驚雨天明庭浸波幾迴臨牖視何異泛舟過砌
失開花滿堦餘觀草多長條疑折葦圓葉作翻荷獨有
幽窗竹依然綠玉柯當風轉孤挺帶濕自婆娑應結蒼
松伴相期碧澗阿秋霜凋衆卉爭奈此君何

七夕雨飲松臯舍人分韻得九佳

與汝結交異行路三日不見無好懷寒官多暇還往易

不以風雨成睽乖更番既已倦輿僕蹤跡豈免疑朋儕
論詩相賞由宿分語似驚羨實嘲諧詞場近來盛稂莠
雖有條蔓亡根芟楚相衣冠惑左右狡黠終是輸優俳
我曹岐趨有何故苦向漫漶求模楷河漢今夕事荒怪
妄者以意窺津涯丈夫要自識真意恥逐俗子由由偕
所憂學嗇難樹立山嶽勢就誰能排談深不畏口枯渴
主人有酒如長淮扶醉出門風滅燭天光照泥星滿街

入夜
聞霰

杜門

小病杜門殊不惡
靜中一倍愛秋清
微寒牀下王孫急
細雨籬根稚子生
閒覺詩懷增攪亂
貧餘酒債費經營
新來自笑耽工課
半夜披衣看月明

秋熱

西風不作力
大火張餘威
雷雨呼莫應
毒熱來非時
七月月向盡
午汗已去肌
昨夜夢顛倒
謂是初炎曦
曉窗日潑眼
如臨洪爐窺
翻身欲起避
衾簟黏膠糲
灑掃就

扉隱嬌兒啼相隨藏冰日十市怒詈來何遲暑寒代有
常奚由失其宜太寬以猛濟遺愛傳良規琴瑟忌專一
改絃待工師敢持區區意仰訴皇天慈

節候

今年節候太支離獨有閒人次第知暑似飢鷹戀韝久
涼如隱士出山遲昨來一雨醒塵夢陡覺清秋赴夙期
日午當窗看竹色微風捲綠入簾帷

中秋例相餽遺貧家此事都絕友人頗有以酒

見餉者喜而為詩

昨宵細雨洗餘熱卧聽寒聲汎窗竹今朝晴天作好月
坐待清光媚幽獨令節屈指不三日比舍喧喧走僮僕
寒家無往亦無來閒看炊烟上墻綠故人相知到嗜好
美酒遞致車連轂未放狂夫杯入唇已見癡兒歡聒屋
豈少貴人相餉遺珍味充口帛盈簾因思天公換歲時
賸遣朱門臭新肉中厨佳醞賤於水涓滴如余已需足
質衣更為買螭蟬不遣便便負此腹却笑阮公無好懷

官酒自供何事哭不學碧鶴裴家郎寂寞荒園自理鹿
贈錢塘吳舒鳧因懷河中吳天章

吳子意軒豁有似高秋鴻息羽就塵坱鼓翼隨天風矯
然衆鳥中一奮千羣空却顧望寥濶誰與為兩雄河上
中條山遙對蓮花峯峯壑相遮羅青翠幾萬重中有棲
託人帶蘿衣芙蓉長嘯臨關門濁浪聲相舂與子才匹
敵姓氏正復同並揚騷雅波交映冰雪容聞當覲來此
晉楚中原逢何故先避去不肯交刀弓故山結茅處秋

色寒濛濛湖如新磨鏡照見松桂叢苟能縱高卧投老
安耕農不然遠遨遊自等無根蓬作詩貴言志飲酒聊
快胃時世方妬色賢達當固窮彼吳昔顛顛上書不得
通丈夫能文章豈必為三公

為舒鳧題吳山草堂

兩峯相憶不相識中著茅亭定可憐那更西湖似西子
橫陳日日小窗前

送朱悔人歸潛江

霜信風高塵滿衣
征人遙與雁南飛
淒涼客向秋深別
珍重身當亂定歸
松竹從添三徑合
江山無恙十年違
翻愁未抵他鄉樂
去日親知有是非

孤酌

短燭照孤酌
長宵容苦吟
窗虛聞雨細
人靜覺秋深
兒女迎寒病
鄉園久客心
無因得料理
爭遣不侵尋

即目

烟外風翻數點鴉
板牆歌處夕陽斜
空庭客去閑門晚

金定四庫全書
零落一堆紅豆花

戲孫子未檢討病瘖學奕

孫郎甚口如蟲鳴嘈嘈頗為流俗憎
冬來肺病漸作啞
歛與雷鼓齊收聲
齒牙翕張不達意
翻怪賓客皆重聽
身手雖好欲安試
寒天瑟縮閒無營
今晨書來語刺刺
終遜舌本工掀騰
假我棋局破岑寂
何異臍脚初修兵
北風激箭射窗紙
黑白在手如凝冰
短燭前頭置酒盞
夜長楸木聞丁丁
吾黨耽奕獨馮子
凌厲同輩誇最能

閉門今知勇可習便擬齊晉相代興勸君且止勿自苦
料理藥具兼茶鐺弛弓橐矢備不用整依律呂調簫笙
他日臨敵戰偶勝高歌奏凱喧輦鉦有時意外值强悍
一叱可使樓煩驚

和太木除夜作

君子敦夙昔纖人艷鮮新荒哉眼底歲欲變風中雲鄰
舍兒女歡遲明作好春寒家燈火靜夜久杯在唇巷柝
入耳急妻子倦相嗔酣眠非不適所戀在逡巡昏眸漸

不支倚壁強欠伸恐有鄉夢迴夢見平生親馮生發歸
興奮作孤鴻騫余豈異人情悲懷難可論

十四夜對月寄丹壑

是日
立春

春風寒近酒杯前街鼓聲中夜可憐愁向東窗見明月
故人居在月東邊

閒

閒憑書卷添眠味暗刻窗陰覺日長暖色待將花打疊
春懷須著酒禁當

感興

二月不見雪積凍已潛消融為夜分雨客枕驚蕭騷曉
晴日氣鮮餘寒不敢驕起看小庭竹覆砌青寥寥枯草
亦茁芽瑣細新雛毛託根久泥土今與陽春遭稍見雲
際鳥飛鳴何交交萬物各有時終戴造物勞

調丹壑二首

張侯邀我入城去西苑水風終日涼却笑人間李公子
出門十步似他鄉


每欲嘲渠等蟲蟄新來看爾似蠶眠除將善病兼能酒
百不如人也可憐

芟竹

抱節久相於因多自翦除一朝窗影瘦昨夜雨聲疎不
惜衰晚日翻憐移植初新梢當戶好著意九秋餘

梅耦長畫幅

只合歸與卧一邱松門蘿徑足清幽誰教老樹旁邊立
黃葉無風也打頭



因園集卷二

欽定四庫全書

集部

因園集卷三

四

詳校官左中允_臣璫五珠

助教_臣常循覆勘

總校官進士_臣朱 鈐

校對官編修_臣方 燁

謄錄監生_臣陳子泗

欽定四庫全書

因園集卷三

左贊善趙執信撰

還山集

園林即目

叢竹才蘇三兩竿杏花如雪壓春寒
雄蜂雌蝶披猖甚却放玉猷冷處看

清明

鄉曲相將作寒食弟兄無恙共清明雨餘花柳逢人好
春半溪山信意行上國塵埃聊復滌中宵魂夢不須驚
持杯酌向山英道莫遣移文斥姓名

園亭雜詩八首

開門流泉側引徑脩竹陰虛亭動遠色微風生古音更
日得異賞寥寥朝市心

久旱萬彙槁一雨四山活軒楹覺曉潤池沼漾新濶覽
時會天遊惟我知魚樂

鳴泉類相和游魚出有羣
鴈飛竹林雨坐接山烟曛
何必侶嵇阮藹然弟與昆

雨脚欲入戶山雲方挂簷
落花爛如織行屐何辭霑
無路溪西去夜來秋漲添

晴日出山脊蕩漾高城煙
幽人倚林表目力窮蒼然
不知晨風翼飄飛何當還

衆芳委逝波幽事屬籬菊
霜時挺峻潔歲晏傷孤獨
昨行山巖際乃識無用木

新月上歸雲纖纖動清影林深多得烟地寂易為冷豈
必聞寺鐘我意默已領

日日城東門一出還一入往來頗知煩動靜聊取適終
愧山居人猶有城中跡

觀鬬促織

金商動傷殺喘戛氣一王俄然角翅完自喜牙鬚壯草
間分蟻穴水次雜蛙唱豈有勢必爭羣以力相尚幽人
洞物情羅取就盆盎無聲出指揮快意見跳浪初合猶

兩疑再鼓乃齊抗標扶猛士心奮迅良馬狀大鳴類
呼小利增跌宕逶迤進恍尋讐獨勝欣得將旁觀識
萬事有得喪一笑天地間孤懷足閒暢

贈山居者

長如野鹿依巖宿偶與流泉出谷行從被遊人問霜樹
都來知邑不知名

遣懷

過眼煙雲忽若馳投閒林壑雅相宜飄風蹤跡青蠅管

素月心情白墮知學道還應輸意怠無權爭擬問窮奇
近來解識逍遙趣溟海蓬蒿信所期

題大木所寄晴川集後

前年送君往武昌贈君束錦充詩囊男兒手持三寸管
取快正在江山長鸚鵡洲邊久留滯身騎黃鶴追鳳凰
歸來爛漫出妙句頗疑胃已收三湘我時縱觀屢擊節
頓從塵垢生清涼矧今削跡處窮谷遠寄無異瓊琳琅
楚騷風流日凌替吾道欲付多岐羊巨手有力惜不用

蠶魚路塞誰開張
漁洋詩翁老於事
一一狎視海鳥翔
賞拔題品什六七
時放瓦釜參宮商
蘇門上客雖旅進
未許與子為秦黃
茲集評點信精審
莫遣流輩輕料量
傳聲吠影兩無當
口似昭曠心蒼茫
我昔有志峻格律
失足羅網緣謗傷
人謂意氣定衰減
詎知胆力猶堅剛
會與五嶽果夙約
獨乘莽眇遊八方
他年自攜三萬首
要向君論抗雁行

訓王阮亭先生見寄三首

生長山水窟新歸似乍經書來羨巖瀑夢去畏山靈醉
遣池魚見吟教谷鳥聽追遊失仙侶悵望向晨星

不為耽閒寂終朝坐擁書敢銜湘水怨祇傍漆園居噫
氣飄風外忘形大癭餘猶多奇字在載酒欲誰如

何事中朝舊他年願卜鄰乘時朱虎讓失意綺黃親斜
日依臺柏驚風蕩塞塵請公樹奇績容我樂芳春

感懷

朔雲南雁思騰騰薄暮憑闌百感增豈有聲名折官職

却將山水換賓朋
壺觴佳興從看減
海嶽前期未可憑
寂寞吟情相伴在
自持詩卷映寒燈

對雪寄準提庵融上人

羨爾安禪處
寥寥遠垢氛
鐘聲出山雪
精舍在松雲
橋迴風常合
門閉水自分
定中應有喻
遲我共知聞

贈徹禪師

昔在大都遊
每過前朝寺
習聞鐘梵音
似會西來意
夙因應有在
往往形夢寐
若欲歸參求
蓄懷久難遂
近獲

出樊籠忽若醒宿醉已將心向空彌覺身為累假憂息
諸緣藉病謝萬事憑誰作導師為語第一義眼中數緇
流潦倒難位置高者盛威容出入陳軒騎餘者競龍斷
蠅營殉財利文章竊皮毛貴游倚聲氣鄙夫多附和市
兒有吐棄咄咄清淨門到此土委地師獨山中居不與
彼同器躬耕孝事母儒者或負媿我今一相見顏狀覺
頓異語言行住外宗旨復何寄俯首欲借問顧慙非上
智塵根除未盡如盲遽求視惟當安鈍拙且免逐臭味

去師禪樓近亂山接惹翠藜杖與芒屨招尋亦良易請
結物外交人間共遊戲

園亭寓目

經月不出郭池臺今整過岸融看水減花晚逼寒多烟
意濃歸柳山容綠上蛾便應隨日至春事莫蹉跎

社日

濃花有信煩風伯微雨何緣乞社公莫上高樓看柳色
春愁多在暮山中

遣懷三首

所思在何許乃在扶桑東
褰裳海騰沸遊目天空濛
手引三足鳥一照天下紅
倦鼓蓬萊作高枕企脚直上方
壺員嶠之顛峯夢迴忽覩水清淺
坐恐飛土揚驚風九州猶變滅
何況羣沙蟲跼蹐復跼蹐不如掉頭拊髀隨鴻蒙

所思在何許三江連五湖
遠追鴟夷步近慕烟波徒當
時汎舟浮家處至今惟有雁
鷺鳴相呼沉沉千尋淵下

有如山魚春風艷桃李吹落不須臾浮雲蔽天白日暗
逝川長此東南輪跼蹐復跼蹐不如刺船徑去偕妻孥
所思在何許乃在桃花源清時欲焉避但羨山中田穰
桃成障閔山口漁人何自來梯攀靈境隨閉塞恥與濁
世通人烟至今閱千載想見桑麻雞犬還依然藉令無
地列阡陌居人仍須絕粒求神仙丈夫短氣向家室宇
宙雖大如籠樊跼蹐復跼蹐愁對屋外山花繁

園林題感

金史卷之三
卷三
柳眼青青媚烟景竹風謾謾帶寒聲生人有意從憐取
一種春來各自情

春寒

乍看曉色漾簾鉤不覺輕寒著布裘風力峭於秋扇發
雨絲細若夏蠶抽分從濁酒尋前醉恥向東君訴舊愁
有約山椒探花信春情爭被夢勾留

三月十五日大雪

似與梨花競曉開春工有意縞樓臺餘寒好為邀殘夢

遮莫天門賀瑞迴

西城別墅十三詠為阮亭侍郎作

石帆亭

孤亭擁石帆百雉列高岸
達人休天釣舟陸豈殊觀
坐鼓滄浪音髣髴中流半

樵唱軒

日暮敞軒窗野色遠浮動
樵歌發何處偶被林風送
和我洛生吟陋彼輿人誦

半偈閣

千偈本無言云何作半想譬如調一絃堂室各應響君
聽手指音故出絲桐上

大椿軒

莊生夸大椿意似悲朝菌春秋八千歲屈指終有畛何
如靜者心一息古今盡

雙松書塢

手把一卷書日夕雙松陰風過幽響激月出蒼翠深莫

羨芳樹姿保君遲暮心

小華子岡

高岡陟無時拄杖戛石齒遙山沒飛鳥秋色復如此不
識追陪者誰為裴處士

小善卷

洞古石氣幽林巒護蕭緘無事此焚香坐愛香烟碧自
悟夙生因海山見靈跡

春草池

岸草衣裊色萋萋媚烟景池水古鏡明照盡青春影懸
知佳句成不待清夢醒

三峯

海客炫靈竒口出三神山乘風去萬里終古何時還且
移太華形置我庭戶間

嘯臺

長嘯臨高臺川谷遠相應林靄忽自開風籟久未定奚
假鸞鳳音所期嵇阮聽

石丈

大塊肖有形真人託不朽坐任苔侵衣卧覺柳生肘年
年好面顏甚媿丈人厚

竹徑

脩竹藹貞萋四序一蕭索野客攜琴來仄徑穿林薄不
愁步履迷前有導行鶴

綠蘿書屋

數椽覆綠蘿四壁繪霜雨中有披髮翁雅調抗千古余

亦絕俗人和歌出商羽

寄劉波山編修

脩篁密樹足涼颼池外朱炎坐不知
忽憶槐陰遮巷北從君索喫冷淘時

追尋噩夢覺猶憎十載衣塵滌未能
學築滄浪亭子好蒼茫不共酒人登

寄新詩與門人謝文治編修繫以絕句

狂風寥落在人間館閣文章已盡刪
好為流傳閒適句

莫教謠詠到溪山

閏月七夕

晚雲不散垂垂雨
烏鵲爭飛一一迴
未必天孫思再渡
世間兒女浪相猜

望雲門山

輕烟漾午晴
十里見山月
稍觀飛鳥度
始識一峯闕
雲生自吞吐
天迴忽穿穴
秋風從中吹
萬樹離披列
空象蘊真境
仙跡傳幽絕
恨身無羽毛
從茲棄塵紲

感事二首

碧山勝賞已全非誰向西州淚滿衣
解識貴官能續命可憐疏傅枉知機

戟矜底事各紛紛萬事秋風捲亂雲
誰信武安作黃土人間無恙灌將軍

壬申元日

元日首四序曜靈明萬方萬方起同時
相攜拜天光海風驅陰翳絳氣連西荒
跋鳥始飛出翩然棲扶桑蚩蚩

橫目民毫髮得所將豈知造化工但謂開闢常今茲值
沉冥理數難推詳星辰夜斂避雲霧朝披猖狂飈挾飛
塵萬彙皆摧藏山川與城郭一氣迷烟霜午景忽躍然
回光不滿牆盪摩見蒼黑倏爍成虧傷蟬蛸潛莫指羲
和走且僵坐令陽德微下土將何望鄉黨紛童叟相視
各倉皇人情說未覩沸語如蜩蟬余時力疾起空庭獨
相羊頗聞儒者言薄蝕非災祥兩曜有交會奚事分柔
剛四海方清寧三公理陰陽大庭用鼓幣下士為秕糠

年歲不我遺青春獲舊亡深居聊取適戶外天蒼茫

棄婦詞

兩姓無端合亦復無故分昔時鴛鴦翼今日東西雲
雲本隨風妾心自不同君心劇無定見棄如枯蓬出門
拜姑嫜十步一迴顧心傷雙履跡一一來時路留妾明
月珠新人為耳璫不恨奪妍寵猶得依君傍寶鏡守故
奩上有君家塵持將不忍拂舊意託相親此生一以畢
中懷何日宣願得金光草與君駐長年

春日園亭有懷

飛絮滿天地春風餘幾時
孤亭臨暮景久坐忽相思
野水浮烟遠空山落照遲
佳人不可見浩蕩憶前期

三徑

柳絮晴方落山花雨更香
苔痕雙木屐池影一繩牀
待月觀魚靜因風聽鳥長
春來陶處士三徑未全荒

閒園

閒園坐長日水木共蕭森
疎竹風前合清池雨後深
遠

山無定色幽鳥自多音霞外餘孤賞冷然不可尋

伏日

谷口羣峯障火雲水風送日易斜曛
拔刀割肉非吾事
自折荷花遺細君

暮大雨

晚風吹不極飛雨浩無邊日月皆歸海
蛟龍亂上天
聲通竹樹雲影泛山川慘澹為霖意安居獨惘然

野興

蕎花開處朦朧遠春雪輕埋草半青
豆莢肥時紛歷亂錯疑簇葉總蠶形
有年比屋迎田祖無事從余說孝經
傳語霜風須著意安排醉眼眺林垌

早行學劍南體

啓明煜煜沈東方欲陰欲晴天正涼
日脚挿地若飛火雨氣過山疑始霜
雞驚人語出村樹馬戀夜飼投秋場
市門一老笑相問忽入城府君安忙

臨淄道中懷古

秋騎羸馬營邱道千里齊風入舊聞雞狗有雄還自許
溜澗無味底須分原頭寒意離離草海上朝光疊疊雲
幾度爽鳩增太息牛山長傍景公墳

過郡城故座主馮文毅公宅

難憑楚些遣離憂搖落非關怨素秋夢斷雲烟還北闕
醉餘城郭忽西州馬嘶荒草無鞭策燕過雕梁自去留
回首春明萬楊柳幾多飛葉赴東流

出郭

朝來微雨過出郭覽秋容
烟隱初生日雲添不住
峯年知古原草心寂寺樓鐘
濯足巨洋水海山尋舊蹤

微雨道中書所見

西風吹霧白難收沙引清溜入地流
綠樹連天村暗雨牛山何處見金牛

牛山西麓溫泉

崔嵬萬古邱石腹出清泚不知華清池
水色何如此我來飲瓊液臨去洗塵耳
濁穢乃名高於茲識所止

寄唐豹巖先輩村居

欲叩城西白板扉逢時觸事與心違
亂山約馬息息過落日將雲片片飛
野水半篙誰喚渡敝廬十步且言歸
空餘借鵲樓中月分取秋光上素衣

寄洪昉思

垂堂高坐本難安身外鴻毛擲一官
獨抱焦桐俯流水哀音還為董庭蘭

自郡歸多病索居兩月未嘗著筆雪後將赴新城

遽成長句

病來詩思不勝秋紅葉黃花索莫休出郭即知山意好
閉門恐向北風愁所嗟龍性常牽俗豈為瑤車慕遠遊
會得高人佳興否雪中驢子灞橋頭

春日郡城無酒言懷

城中三日風野客迷朝昏誤疑酒所致豈知未霑唇愁
疾強扶策況復拋青春遣尋諸從事往往皆賢人凌陰
戀權勢太皞幾退奔冰花耀枝柯桃李不敢嗔寒威入

衣袂鼻氣增酸辛安得一瓢佳生我四體溫敝廬有羸
藏風味清而醇餅罌二百里失計單車輪戶庭能免咎
嗜慾恐汨真太息稷下士古言誰與論

醉歌贈同年張薛杜三廣文

秋谷先生怕孤悶青衫席帽來州郡春風三日柳滿天
自擁犂騶鞭不進廣城如夢身自藏故友如烟誰可問
三公何意相隨來各將奇兵赴愁陣薛張幾日別海鷗
皆海上人風格雖寒故清峻杜生與我齊飛揚酒氣猶能護

青鬢廿年往事猶浮沈欲指雲門比離恨即今大府盛

文儒

學使者方在郡試士

憶昔吾儕嚴鞮剗九原墳草又清明

同年

五十三人死者十餘矣

生得相逢今者僅冷官正喜少拘牽逋客

還矜出塵坳解衣徑就市壚沽閉戶遙同竹溪隱不辭
連醉破昏朝屋角花開雷雨迅

寒食

寒食寒猶甚春光底處賒風聲勒楊柳雪意逼桃花城
遠山烟澹天低麥壠斜酒邊倦倦遊客十日覺離家

清明登雲門山

雲門山勢春雲橫迴岡簇起如簫笙中間石氣忽決圻
古鏡照耀懸窗櫺下臨齊城月華滿桂樹掩映江山形
凭闌駐馬每望見恐是閭闔無由登童年結願墮世網
歸來始得尋青冥郭門南畔踏芳草天氣正喜清而明
仄徑延緣訝破碎顛厓近逼增崢嶸羣松離立類闔者
闔然欲與人爭行山風四吹變煙霧却疑鸞鶴繽紛迎
空潭古洞閔幽境待我拄杖傳鏗訇門中掉臂忽自笑

虎豹不怒天闕寧簷牙錯落殿交角勝地往往棲神靈
王母蛾眉颯霜雪衆仙雜珮璆鏘鳴弇州山人好聲勢
殘碣賸遺愴荒驚高亭削壁覽題記千年吾愛曾空青
悠然會意誰與語溪桃澗柳空含情銜杯枕石縱獨卧
遊人但怪顏何頽連峯西去浮落日歸心遠目相牽縈
城闌回首動暝色大星一點留光晶通天匙鑰倘可乞
我欲翻飛朝太清

山中石刻文字甚多非浮即俚惟曾子宣率僚屬及六子遊山題名書法

雅逸如新似空青居士紆筆紆子宣第二子也東
峯有留弇亭藏弇州山人王世貞詩碣亦不佳

訪友村居

麥與柳深淺柴門相映開春風無間處野客有時來語
久雲景變主人歡酒杯醉餘應自去微雨莫相催

不過怡園二首

城日山烟鎖寂寥石闌苔徑望迢遙遊人自上清音閣
流水還過後樂橋

堂榭虛間碧沼清長天無主自陰晴最憐荷葉兼蕉葉
送盡風聲復雨聲

因園雜興四首

雨過空山草木香
軒窗綠重午生涼
流鶯聲滑幽眠熟
但道人間白日長

臺上松風吹野烟
峨眉新黛遠相連
不須更翦青梧葉

已見山椒六六泉

泉出石壁下壁有前人題名
稱六六子余因取以名之

清池一曲浸迴廊
斜日朱魚爛有光
負手巡簷喚魚晚
野風時送棗花香

林巒佳處日平西
竹柏無烟咫尺迷
山月漸高人影寂

溪南還有鵲鳩啼

苦雨

濕雲無賴壓荒烟時遣轟雷入醉眠黯黯山城惟積水
沉沉夏日更如年驕龍逆作窮秋氣赤帝空持大火權
莫問郊原騎馬路碧苔青草總堪憐

題文姬觀獵圖

天山霜草白於雪金勒明駝行復歇賢王前行屢停鞭
顧笑欲得車中憐車中美人色頰玉漢日邊風摧鬢綠

旃裘乳酪鎮相親
寒束芳心羞不矚
健兒身手如犬鷹
爭倚彫弓馳射生
忽聞鳴鏑雲間響
何似焦桐絃上聲

題郭令公退回紇圖

汾陽功業扶天日
一木峩峩造唐室
古來何代無魚程
當時猶奪汾陽兵
功臣僕固為戎首
閭主驕奄齊束手
軍中忽閃令公旗
回鶻十萬如伏雌
連營奔散晨星滅
戰馬不驚笳吹咽
入關空破雁門煙
出塞惟將漢家月
長安一日啓九門
手持畿甸奉至尊
辟雍將將高座矗

諸生聽說覆公餗

薄薄酒

薄薄酒勝茶湯不信試酌與君嘗
雲陰月黑旅夜長孤燈照夢隔
故鄉輕寒被體如雪霜此時細引
不成醉栩栩自覺春風香擬陪瑤池
宴高冠揖穆皇玉女八九人紫霞
勸天漿不然沉香亭戲草清平章
玉手玻璃盃葡萄豔晶光人生待此
始痛飲便應長跪辭杜康借使昔
遊曾快意夢之帝所安可常

悲驪馬

故人送我國西門贈我驪駒出瀚海北風吹鬣入寒雲
千里凝冰渺相待杯中醺醖相與傾袖底珊瑚不須買
騰身揮手疾於飛好爵良朋兩遺躡家居本在岱山陰
一日霜蹄碎礧磊春來花發萬峯幽玉勒黃塵恣前灑
去秋縱轡訪神洲擬躡方蓬刷渤澥誰知中道忽然迷
紫燕啾啾失鮮彩丈夫壯志久摧頽分學庾桑老畏壘
獨憐我馬氣難降死骨甘心擲燕隗未令峻坂服鹽車

忍見敝帷埋夾塏酒酣自擊唾壺殘白日迴光天色改
聽張翁搥鼓聊為短歌

春風吹花花不開羯鼓落手聲如雷文人脫帽散霜雪
自倚撻撻送明月酒酣似欲鳴不平奮臂直與金石爭
漁陽壯夫髮上指千古雄心曲中死鸚鵡西飛江漢空
人間此技久難逢為君起舞花影中使我三日猶耳聾
喜門人張浴日自山右來省却贈其還

林扉掩亂山落日萬重翠麥黃桑甚熟黃鳥猶不至子

從何處來疑是天上墜入門向我拜執手各駭視十年

兩相見心跡託宵寐豈意灤水魚忽為隴水騎

去年曾由灤上

寄書

子家太行深我昔傳征轡青松拔雲雪黃河綴天地

極知登覽優敢謂經行易相尋無險難子真饒古意藏
酒當盡傾欲去更同醉持我遠遊心千里為傳致

寄博興杜廣文

山窗枕前水北落錦秋湖湖上故人遠山中清興孤何
時歌短棹載月入菰蒲極目相思處遙天秋雁呼

因園集卷三

欽定四庫全書

因園集卷四

左贊善趙執信撰

觀海集

東嚮言懷

秋草綴白露淒迷曉色寒怪余竟何事結束辭家山東
去入溟渤天水相漫漫豈有古仙人引手許延緣男兒
負奇志夙欲吞巨川轉側在世網焉能死草間長風倘

可駕一上蓬萊顛安期何用見但取開心顏

臨淄詠古六首

淳于墓

昂藏贅壻走王門斗石區區聊與論一醉欲傾天下士
何人送客獨留髡

淄水

寒沙小渡遠逶迤淄水東流無盡期莫怪田巴清自鏡
要將面目示齊兒

三士墓

石父曾令脫網羅
留將三士竟如何
孟嘗坐食三千客
拚盡園桃殺幾多

愚公谷

牛馬何心一任呼
觀臣狀貌故應愚
寄言谷口諸年少
好為伊人繫白駒

棄繻生墓

却被關門識此生
尺繻談笑換長纓
祇憐賈誼空流涕

贏得長沙鵬賦成

梧臺

城南萬木入天風
雨送秋聲過故宮
總是於今蕭瑟地
當年那更樹梧桐

望溫泉

日照牛山石上泉
琉璃浮動出寒烟
驚心沙路晶明外
潑眼風林搖落前
沆瀣試嘗應不減
清冷可枕豈虛傳
揚鞭却與飛流語
比到東溟孰後先

乘車渡巨洋水

乘車如乘船却顧失船尾倦馬一聲嘶雙輪碾寒水惟
裳動郭索容蓋入渺瀰僕夫揮長鞭豈有楫可理中流
縱遭迴彌望出涯涘絕勝繫瓠樽拍浮不自止濠魚樂
獨知海鼈笑無已借使求三山安能泛萬里

月

海月自東出照人如有心猶懸九秋影頓失昨宵陰疊
嶂依雲遠空烟向水深無因乞靈藥桂樹漫森森

昌樂道中

輕轆輕車不動埃營陵舊社曉徘徊青林白露微茫下

丹

水名

岸黃花瑣碎開城日初懸遙海色野風偏向晚秋

哀行人莫訝宵衣急要踏鷹揚賜履來

昌樂過閭諭德前輩話舊

菊籬茅屋正蕭然往事隨君到眼前荷鋤真堪喚牛走
拂衣同是值蛇年青門夜月三更夢丹水秋風十畝田
莫倚清樽說生計神洲東去海浮天

雨霽早行

寒雨淨天色曉風收暗塵亂霞明綺皺初日上金輪草
草鳴雞市息息渡水人涼秋縱東走海氣正鮮新

灘水詠古

昌邑名芙蓉城

芙蓉城外秋蕭灑古渡寒波渺東下舟人猶說淮陰功
墟里空存柏欄社昨過瀾水

即巨洋

按圖經大耿差堪凌

鄧賈如何人傑冠蕭張不得雲臺姓名寫列侯未保及
身榮劉氏齊王許誰假白水真人赤帝孫當代應羞漢

恩寡擬將灘水上游沙燒作未央前殿瓦

垂至萊州興盡却返

海天遺興竟如何返轡真成此浪過萬里沙頭風色迴
三神山上夕陽多餐霞食棗元無分彈鋏思魚漫作歌
歸去清真堪自守不將身事問滄波

再宿膠水客舍

去海三十里北望空冥冥斥田秋草白古竈鹽烟青信
宿非懷土寒霜又滿庭夜潮如有意遣我醉中聽

寒亭雨夜對酒遙寄諸弟

寒亭兩度逢寒雨，孤館秋燈照酒卮。
海外方蓬遲後約，山中萸菊誤前期。
仙人攀樹徒欺我，羣季開樽更憶誰。
為報西風莫吹斷，預教歸夢過清淄。

歸途即目

霜樹荒村又午雞，去來應自笑栖栖。
秋風吹水偏流北

自巨洋以東
水多流北

海日催人却向西，遠目欲迷山影轉。
雙輪

曾壓岸花低相逢，若問何聞見袖裏詩篇只自攜。

戲題

冰雪寒多空自抱青冥路絕與誰攀
早知卿輩真難記
何意相逢飯潁山

却寄途中諸水

幾臨秋水滌風埃不學東流去不迴
海若形容渾未識
寄言衆壑莫相猜

與馮信州躬暨夜話感舊

空村萬木號寒雨坐來歇秋燈照病顏
各已生華髮庭

軒颯以清壺樽偶然設豈知故鄉親有似天涯客十年
異出處相望若秦越心依玉山雲夢斷金門月欣逢水
聚萍惜別風振葉人生離合情且與盡今夕鵲驚三匝
飛鵬去六月息何處與子期神洲有銀闕

馮文毅公別業古柏

公今遊戲仙人鄉手折苦木攀扶桑却揮龍騎返故里
碧鬣蒼鱗欲飛起化為老樹當庭蹲排突雲窟盤山根
要將直幹留天地豈為清陰覆子孫我來俯仰三歎息

何必新甫之顛錦官側吁嗟乎門前幾日不霜風君看
萬柳何顏色

題信州所畜白鸚鵡

自愛晴窗理雪衣霜風還為下簾帷情知舌巧王孫喜
不向金丸落處飛

題抄山圖

深山窮壑妖所都帝遣丁甲行天誅飛廉屏翳豐隆俱
鬼獍神怒爭前驅戈矛霜耀森旌旗彼主者誰提鹿盧

金甲錯落鬚眉粗前伏帖息為於菟何不乘之趨亦趨
却跨兩鬼麾前徒雜還萬衆飄風徂蟻視蛇虺鼠熊羆
剗胷碎首不須臾立使幽險成夷塗窈窕巖洞中紆徐
猿獠狐狸相與娛炫服麗質人無殊新妝盈盈施粉朱
狙公醉倒笑語扶義冠墮地猶狂呼大罰降矣何其愚
死且不悔可歎吁巨蟒脩鱗千丈軀舉頭倏忽排雲衢
掉尾已斷將焉逋黑螭拳縮甘就拘潛飛無計空牙鬚
俛視水溼羞蝦魚禹鼎象物良非誣烈山焚林勞朕虞

未抵神力工掃除閭閻巍巍臨太虛清問下逮知民瘡
山川永奠人安居麒麟鳳凰豈竟無問君胡然為此圖

途中雜感二首

龍腹龍頭誰是非名高容易與心違千秋皂帽比肩者
只有仙人丁令威

上天入海事虛無縱飲東方計未迂借問金門名業在
都將分付牧豬奴

野行訪王文學不遇

秋田泥活活野路半分明露下麥初茁烟中人自耕溪
沙夜牛跡村舍午雞聲惆悵林扉寂幽人不出迎

不得遊九仙琅邪諸勝留別王汝敬汝謹兄弟

結願苦不遂吾生難自任故人滿目前相對惟悲吟天
寒日月逼海近雲霧深馳馬忽歸去清淮漸我襟

灘亦名淮

雲中九仙人揮手笑不禁豈意郭日山障此一寸心秋
風浩相送却顧烟在林馬耳幸無恙盧敖期重尋

過鄭公鄉感懷

康成去已久杭稻荒書堂書帶在何許不如秋草長此
間頗豐饒萬足傳魚梁人言管公都當羨鄭公鄉二公
相視笑吾意故難量君看鴻鵠舉雲海恣翱翔

旅宿見王子言侍郎壁間題句愴然感懷成二

絕句

於今海嶠秋風候還似天門暮雨時忽憶當筵索狂飲
何如敗壁讀遺詩

廣陵絃絕竹林愁阮籍迴車哭未休千載窮途數行淚

無人解道為同遊

平度州道中望東北諸山

秋風吹倦客縹緲凌紫霞赤松仙人要我去為駕白鹿
青龍車羽輪飄飛不自制始計已失秦琅邪大勞小勞
遠相待回馭又復成參差明霞碧落香夢寐玉女有爪
羞搔爬北行度膠水惟見塵與沙晴嵐百里豁心目高
望一點青於鴉衆山肩隨出戢戢木末爭槎枒天柱孤
標依蕭爽下笑兩髻魯始髻東萊岱華列首室不敢加

譬人名既成無事相矜誇大澤東來獨雄傑森然列仗
排高牙雲峯飛瀑落千尺烟光蜃氣無由遮臺殿嵯峨
布空曲浮金炫碧生谿研我今矯首意愴恍況於抗策
窮幽遐人生能幾何引領白日斜海山有約易錯遲此
中便可終來家

藥石水

大澤亘萬壑雪瀑生金泉飛流不東注逶迤林薄間海
中有靈藥帝力不可干神人故相靳地氣鬱欲宣歲蕤

被幽谷馥郁滋長川微風引香遠皎日臨波寒公沙飲
白鶴此事昔所傳突兀青山臺秀色明霜天我欲褰裳
去服餌遂忘還且復進一掬塵襟倘可捐

金泉山名
白鶴泉名

萊州詠古

天光盡處指神洲碧海丹霞萬里秋千古雄心百年恨
三山亭北是沙丘

三山亭漢武所築海岸有沙
丘城俗亦指為始皇崩處

山行求道士谷及長生披雲諸洞處

在萊
州東

曉日出海如新沐光射東方山更簇白沙已沒祖龍城

青嶂猶藏道士谷我來含笑凌巔岼惟見翠樾蒼松寒
山烟十里浮空碧知是披雲人煉丹

將赴萊陽道中作

姑尤二水亦
名大沽小沽

松雲沙水際微徑引崎嶇天入東南海山圍大小沽人
煙連島嶼風日近茱萸錯莫王猷興窮秋信所圖

萊陽雨夜對酒贈同年張伯績兄弟

高城吹角引嚴霜良夜開樽共燭光傍海魚龍多出沒
方秋雷雨更蒼涼年華荏苒看籬菊身事蕭條寄醉鄉

家在蓬山雲卧穩故人且莫歎滄桑

偶題

服食何心覓大還勞勞但取換閒閒要知伐木牽蘿處

不向芝山向藿山

二山俱在萊陽

重九亭子山登高

仙人結亭就松樹至今松色離離青松間時復有人至
惟見石壁銜清泠霜催客鬢不辭醉日落秋聲誰可聽
仙人此際俯視笑海山亭閣雲長扁

遊伯績東園

不知門徑處黃葉自成堆是爾種瓜地為余攜酒來秋
風生水曲霜月轉城隈已遂十年約重傾九日杯

別萊陽

十日醉眠穩都忘東走迷離心忽渺渺客路又栖栖霜
樹明見野城烟寒過溪羸驂如有戀却望郭門嘶

暮抵棲霞

秋色組青黃幽叢亂松茵晚日照逾妍空烟寒向盡山

深路屈盤霜老風淒緊草際清淺流紆迴似相引峯開
睥睨明水濶樓臺近誤疑到汪洋已見驅蛟蜃入郭如
有獲披圖始自哂託宿碧霞端仙期夢應準

絕句

萬里海風吹片雪紫皇一笑電光開霜寒歲晚梧桐老
飢鳳啾啾何處來

李詩孤飛
一片雪

隔清泮水見山寺寺門霜葉甚盛

斜日秋山一掩明寺門迢遞落鐘聲半篙白水千紅樹

金史卷之八
疑到櫻桃澗底行

福山有
櫻桃澗

福山縣就同年陳踞庵宿語次及長安故人

入門一長揖相見海山間把酒對明燭何如疇昔顏寧
辭我獨醉聊與子同閒已結紫霞侶空懷青瑣班

對酒寄任登州具茨時淹歷下

蓬萊主人深避客何事三秋歸未得故人却趁西風來
拏舟徑到三山迴羣仙招我入雲去自愛掉頭不肯住
拚將身計託糟邱忍使情交隔烟霧霧重霜深醉起遲

惟憑海日寄相思遙憐來帶趨公府正是神山日上時

被酒贈踞庵

踞庵天性不飲而家蓄
昔酒甚富詩才亦起

陳生意氣何卓犖每謂古人今可作餘力間出為新詩
清響竄然動寥廓壯懷方擬凌雲烟剛胆翻令怯杯酌
應緣造物忌豪雄恐爾狂酣搖五嶽我從放後拙言詞
不遣悲吟赴謠詠酒兵積漸亦已疲猶令偏師且前却
昨攜短策逐鴻蒙西風吹背霜侵腳始過東武後昌陽
隨處虛船自漂泊舊知不棄邀我食一一盤筵致珍錯

徑將海國比屠門總使甘鮮換藜藿飢腸雖充如有亡
意外新醅失前約濁賢接跡來無時強飲終羞鸕鷀杓
竭來訪子之梁陽但欲高歌激海若清樽入手忽信眉
一洗胃中九秋惡怪君不飲有厚藏正似束書置高閣
投轄便為十日歡留賓立盡千金索寒山蕭條雲壓城
缺月微茫夜傳柝聽君吟誦鶴唳天看我沉酣魚縱壑
人生適意貴當前夢擾魂驚真齷齪常持美酒對故人
多事祖洲求大藥

秋盡日感懷

鄉俗以十月朔上
冢今年正當立冬

西望寒山千里秋飄飄身落海東頭壯心豈為金丹誤
往歲空將玉舄留不覺衣裳侵霰雪遙憐車馬擁松楸
清霜事畢黃花了明日新成一種愁

久滯福山贈邑中諸君子

山城倚滄津著眼若黑子由來蘊仙靈乃有佳人士二
鹿各好文一郭猶秉禮龐眉陳文學言必舉前史我友
瑰奇姿朗抱脫泥滓雖異鄴中才頗與竹林似見我皆

歡顏迎我皆倒屣邀留散煩懣日夕醉多旨我如失林
鶴飄飛不自止何意洪厓儔披雲笑相視尚想崑崙顛
一候蓬萊市移家定未能且住為佳耳

始見海

洗眼看雲海前期未參差心目忽一豁神情恍四馳大
地直前赴高天歛下垂顛波從東來神山競西移斜日
萬里碧寒風十月吹半生在埒井跬步臨津涯蠡測亦
云妄桴泛將安歸玄虛倘可作詞賦猶能追

望之果二絕句

誰臨青鏡裊烟鬟夕照遙分海面山傳語蛟龍守宮闕
暫令仙侶住人間

屈指秦皇勒石年雄文二十字流傳當時總遣山為碣
誰向滄溟護一拳

題海岸小溪

沙岸圻遠海微涓先見容為憐江漢水萬里始朝宗
雪晴過海上適海市見之果下自停午至晡快

睹有述時十月十日

今晨雪乍晴寒日生扶桑出門邀河伯東嚮同望洋昨
日之梁山紫翠點水如鴛鴦未至二三里見人欲飛翔
坐來忽復不相識迴峯疊障皆摧藏赫然烟靄中城郭
連帆檣疑是秦樓船歸來閱千霜又疑瑤宮與貝闕神
山倒影滄流長飛仙驂虎豹晃漾凌波光招招不得語
目極天蒼黃同遊競指是海市對之使我神揚揚歲序
閉冰雪魚龍走顛僵非時出現麗此遇超尋常當年蘇

夫子雄詞自炫驚海王慙予本凡才未敢縱筆相頡頏
不請亦得睹失喜欲發狂巨川細流兩無拒信知大海
真難量準擬還家詫鄉黨詎肯此地辭杯觴天窮人阨
總莫問微塵大地俱荒唐客散境變滅半山還夕陽醉
歸却聽暮潮上浩浩天風吹面涼

月夜飲酒燒蠟房贈陳康海

月滿古鏡耀潮至羣龍吟主人有玉壺屢為酒仙斟仍
呼丹砂童吹火竹爐深一煉碧山骨遂陳綺席琛杯吞

渤海波食割蓬瀛岑不惜盡寒夜因君豁煩襟

泛海言懷

忽登萬斛舟如躡長鯨背寄身入無涯曠覽乾坤態潮
動風色適棹急雲光碎潛隨元氣遊迴出人境外千山
相簸蕩六合欲橫潰頓覺喪吾我何知齊小大勿安漂
泊久謝傅襟情在誰發小海謳迴颿引雄檣

即事

大雪三日十日陰窮冬坐學秋蟲吟茲遊汗漫不自解

對客猖披非我心
山翁折屐村徑滑
稚子送酒寒更深
不如却訪成連去
萬里雲濤無路尋

晴日村南

朝曦上窗戶
許我出村行
海暎半天雪
松吹十里晴
溪流有歸處
鳥雀盡寒聲
不覺山中客
遙牽歲暮情

再寄任登州

歷下亭邊秋色改
明湖寒水東流海
飛雪滿天不見君
迴賓為主遙相待
海上沉沉絕素書
經時烹盡錦鱗魚

請君歸掃蓬萊頂我欲丹霄騎白驢

遣懷

東來作計近全非半欲棲遲半欲歸
病喜賓朋同雪夜寒知僮僕尚秋衣
沙鷗日久隨人狎塞雁天長背海飛
久不得家書何計差堪解愁思清樽潑盪蛤蜊肥

大雪日簡踰庵

飛光誤我守東隅坐閱杯中節候殊
蝶化寒宵渾自覺萍依絕岸未為孤
辭家見月三圓缺對雪看山半有無

宿醉欲醒千日過人間何意尚迷途

赴登州留別康海

微雨牽行色離觴且對君預愁見何日不惜手輕分遠
海高於岸空烟聚作雲來朝倚仙閣吟望背斜曛

海潮庵

萬里青蓮色虛空擁化城人隨海鳥至僧帶磬聲迎梵
唄潮相應樓臺蜃不爭登臨悟無住渾欲厭浮生

蓬萊閣望諸島歌

君不見不周崩摧地維裂東南海濺共工血千山萬山
皆平沉鼇撐無力海水深女媧揀石煉天色餘塊累累
向空擲落處蓬萊淺且清看當霜雪寒逾碧長山西接
沙門長鼉磯北去凌蒼蒼牽牛滅沒見尻臂大竹小竹
爭頡頏或如星槎墮河漢或如古鼎騰光芒魚鼃戢戢
盡昂首雲霞歷歷森成行餘者瑣細不足數鷗浮鷺立
參微茫雄觀何年付高閣丹邱縣圃簷間落雲卧分明
見鳳麟天飛真擬驂鸞鶴驚風颯颯碣石來銀濤連山

中劃開漂搖島嶼相摩戛激盪海底生轟雷登高望遠
心易哀黃昏白日須臾催半城烟火下山路身是仙人
被放迴

坡仙詞

五日登州守千秋海市詩蛟龍留勝跡雨雪滿荒祠才
覺乾坤盡名將日月垂丹青餘想像漂泊識鬚眉島翠
堆虛牖簷絲罥斷碑仙靈幾延佇山鬼強攀追黯淡蒼
苔氣凋殘碧樹枝壽陵歸國步鄰舍捧心姿徧選丹厓

字誰為黃絹詞寒山公獨在坐卧我於斯酒酌滄波遠
吟耽夕照遲方平有雲駕肯負執鞭期

田橫寨詠古

骨換黃金赤驥趨何煩絕海覓龍芻但令和氏能知玉
謾道齊門總濫竽舍客三千兩雞狗島人五百一頭顱
憑誰寄問重瞳子死到虞兮更有無

大風登海鏡亭觀潮

疾風鼓窮冬大海勢一變頓收浩漾形坐獲奇麗觀聳

身列缺旁側足虬龍畔譬如倚閭闔下見元黃戰波騰
銀屋翻沫乳白雨亂萬靈助呼吸百怪忽隱見東連湯
谷沸北汨雪山轉恍忽掣丹厓蒼茫吞赤縣天吳本肆
威飛廉苦相煽莫測天地機但覺心目眩倍看城市親
遙被舟楫羨一笑險夷間吾生失憂患

海潮庵觀出月

晚潮碧黯黯寒月金玲瓏誰持琉璃盤捧出蛟龍宮方
圓隨想像根蒂生空濛黏雲欲飛動蘸水聊從容長風

蕩千山夜色明萬重幸依繫象前得闕顧兎蹤披懷倒
冰壺揚袂拂桂叢七寶待修合相期跨星虹

食海族有名海腸者戲為口號

越國佳人空有舌秋風公子尚無腸假令海作便便腹
尺寸腰圍未易量


却望登州

碧水遶丹山重城雲雪間迴看身卧處真作海中關誤
被神風引遙尋陸地還故谿堪枕漱仙路莫輕攀

早發沙河店是前年却迴處

過此望海
惟見霧氣

沙和積雪壓村低客路曾經到此迷三載迴環貪碧海
平明行李信黃雞東來日射山形斷北下天橫霧陣齊
破浪雄心渾未愜乘風更問大荒西



因園集卷四